

30. januaari 2017

Inatsisartut suleriaasiat § 37 naapertorlugu matumuuna Naalakkersuisunut apeqqutit imaattut saqqummiuppakka:

Apeqqutit:

1. Naalakkersuinikkut nunaminertanik takornarianut immikkuullarissumik soqutiginaateqarluartumik inissisimasunut nunaminertanik atuisinnaanermi siunnerfigineqartut suuppat?
2. Nunaminertanik atuisinnaanermi nunaqavissut sumiiffinni ataasiakkaani atuinissami salliuinneqarnissaat Naalakkersuinikkut anguniarneqarpa?
3. Takornariat Ilulissat eqqaani ornigarluartagaat Eqip sermia nunaminertamik atuinissamik qinnuteqarfigineqarsimava?
4. Taamaattoqarsimappat kikkut qinnuteqarsimappat, qinnuteqartullu ataasiakkaat qinnuteqaatitik piffissaq suna pisortanut ingerlatissimavaat?
5. Nunatsinni sumiiffinnik allanik takornariartitsivissatut siunnerfeqarluni nunaminertamik atuinissamik qinnuteqartoqarsimava?
6. Taamaattoqarsimappat sumiiffiit pineqartut sumiippat?
7. Naalakkersuinikkut takornariaqarneq pillugu siunnerfigineqartuni sumiiffinni oqartussaasut Kommunalbestyrelsemilu tusarniaanermi oqariartuutigineqartut malinneqarniarpat?
8. Nuna tamakkerlugu takornarialerinermi pisortat suliffeqarfiutaat (tamakkiisumik tamakkiinngitsumillu piginneqataaffigineqartut) qanoq annertutigisumik akulerusimatinneqarpat?
9. Pisortat suliffeqarfiutaasa nunaqavissut takornariaqarnermik ingerlatsisut namminersortut kiisalu siunissami nunaqavissut takornarianik ingerlatsiumaartussat unammillersinnaassusaannut sunniutissai piffissaq qaninnerusoq ungasinnerusorlu eqqarsaatigalugit Naalakkersuinikkut nalilersuiffigineqarsimappat? akulerusimanerata nunaqavissut namminersortuaqqat unammillersinnaassusaannut sunniutai kingunissaalu ungasinnerusoq eqqarsaatigalugu nalilersuiffigineqarsimappat?

10. Naalackersuinikkut misissuisoqarsimava Kalaallit Nunaanni takornariaqarnerup Kalaallinik nunaqavissunik qanoq annertutigisumik akuuffigineqarnerisooq? Taamaassimappat kisitsisinngorlugit pigineqarpat?

11. Naalackersuisut kisitsisinik ilisimasaqarpat takornariartitsinerup iluani aningaasat qassit Kalaallit Nunaanni kaaviiartinneqarnerisooq? Taamaattoqarsimappat aningaasat nunatsinnut agguaqatigiissitsinermi qanoq annertutigisut nunatsinniiginnartarpa? Qanorlu annertutigisooq nunatsinnit anninneqartarpa?

(Inatsisartuni ilaasortaq Vivian Motzfeldt, Siumut)

Tunngavilersuut:

Kalaallit Nunaanni Inuit Pisinnaatitaaffii qanoq nukittorsarneqarsinnaanersut pillugit siunnersuisooqatigiit ukiaq 2016 saqqummiussaani pinngortitami pisuussutit pillugit ima innersuusuteqarput: *“Nammineq aalajangiisinnaatitaaneq inuit pisinnaatitaaffii pillugit isumaqatigiissutini arlalinni allassimapput, tassunga ilanngullugit inuiaqatigiit oqartussaaffimmik iluanni pisuussutit pillugit namminneq aalajangiisinnaatitaanerat. Inassuteqaatigaarput takornariartitsinermi akuersissutit pillugit inatsit naapertorlugu akuersissuteqartarnermut atatillugu innuttaasut sumiiffinnilu innuttaasut peqataatinneqarnissaat Naalackersuisut qulakkiissagaat, pingaartumik piunasaqaatinngortillugu inatsit naapertorlugu akuersissuteqannginnermi innuttaasut inuiaqatigiillu kassuarneqartut tusarniaaffigineqartarnissaat.”*

(humanrights.dk qupp. 12)

Naalackersuisut sulinerminni sumiiffinni tusarniaaneq tusarniaanermilu oqariartuutigineqartut qanoq paasivaat, qanoq atorumavaat?

Sumiiffinni innuttaasut takornarialerinerup iluani aningaasarsiornikkut ineriartorfissaqarnissaat nunap aningaasaqarneranut pingaarutilerujussuupput.

Ineriartornermut akisussaaqataaneq piginnittutullu misigissuseq peqqinnartumik ineriartornermut tunngaviupput, taamaammat qulaani apeqqutigisakka akilertorneqarnissaat kissaatigalugu ingerlatippakka, naatsorsuutigaaralu ullut suliffiusut qulit iluanni akineqarumaarlunga.